



Cjstielgnûf, publicade la mape catastâl dal 1822

Une plombe tal passât che e permet di discuverzi il teritori viazant tra borcs, cjasis, manufats e colturis di chel timp

Un document inedit che al permet di fâ un salt indaûr di plui o mancul dusinte agns e scuvierzi lis proprietâts fondiariis, l'ûs dal teren, i nons dai lûcs, il teritori di chel che vuê al è il comun di Cjstielgnûf (Pn). E je la "Mappa del Catasto terreni del Comune censuario di Castelnovo, Distretto III°, Provincia del Friuli", che e ven publicade par cure di Anna Frangipane, ricercjadore di Architetture tecniche dal Dipartiment di ingegneria civil e architetture de Università dal Friûl, e je stade presentade vinaris ai 23 di Avost propit a Cjstielgnûf.

Il volum, intitulât "Nomi, luoghi, manufatti. La mappa del Catasto terreni del Comune di Castelnovo (1822)" al presente i dâts de mape, butade jù intal 1822 dal Uffici de Zonte Imperiâl Reâl dal Censiment, ufici cun sede a Milan, che in chê volte al veve la direzion dai lavôrs di catasticament dai teritoris dal Ream Lombardovenit. La publicazion e je part de golaine Pagjinis dal Ecomuseu des Dolomitis Furlanis "Lis Aganis", là

che intal 2011 Anna Frangipane e à publicât "Il territorio costruito di Castelnovo del Friuli nel primo '800. Un percorso di lettura attraverso i primi documenti catastali", Olmis Editôr, Osôf (Ud).

La Mape (che in copie e je conservade dal Archivi di Stât di Udin e digitalizade tun restaur par garanti la sô conservazion, stant che al è un document un grum delicât), «je di fat – e conte la Frangipane – la prime rappresentazion sistematiche e dedicate dal teritori di Cjstielgnûf, document prezios no dome pe cualitât estreme dal segn e de cromie, ma, sofredut, pal valôr documentari, pont ineludibil di pertence par cuialsei sei gnove ricercje cun valence teritoriâl».

Si pues pensâ che e sedi stade disegnade cui dâts di campagne cjapâts sù intal 1810 dai tecnics dal Ream di Italie di Napoleon, «la Mape – e precise la Frangipane – e da la division des

proprietâts fondiariis, cul riferiment indispensabil de numerazion catasticâl, element di colegament cui Somarions, regjstris censuaris che la lôr redazion e termine, pal Comun di Cjstiel-



La autore dal studi, Anna Frangipane

gnûf, intal Otubar 1809».

Propri il colegament cun chescj regjstris al permet «di caraterizâ i terens – e zonte la Frangipane – cun altris informazions sui nons di lûc, su lis proprietâts,

sul ûs dal teren, su la estension, intune sorte di "fotografie" che e ferme il timp di chescj lûcs, intal moment che a stan par vierzisi ae modernitât. E propit partint dai nons dai lûcs, al scomence il divagâ inte Mape, cui borcs, i edificis sparnciâts, i manufats e lis colturis, cun rimants aes presincis significativis, ai ûs, ai nons dai lûcs, intune sintesi che e rimande a spazis futûrs di ricercje». Il lavôr al è integrât des Notis toponomastichis di Gianni Colledani, studiôs atent dal teritori "cjastelan", che a furnisin indizis puntuâti su la storie dai lûcs, sui ûs, sui leams cui terens e la comunitât.

Il lavôr al è stât pussibil in graciis de disponibilîtât dal materiâl documentari dal Archivi di Stât di Udin. Chesc materiâl al è risultât di un recuper di fonts dismenteadis e no dopradis in plui Archivis dal Stât, ricomponûts tant che une unitât, dentri di un projet decenâl,

inviât ae fin dai agns '90, che al tocje la storie dal teritori e dal paisaç, curade de dotore Roberta Corbellini, direttore dal Archivi di Stât di Udin.

La publicazion e je part di un projet di cognossince, valorizazion e recuper dal teritori costruît e des colturis costrutivis dal Comun di Cjstielgnûf, inviât intal 2011 in graciis di une colaborazion trienâl tra il Comun di Cjstielgnûf e il Dipartiment di ingegneria civil e architetture de Università di Udin. «L'obietiv – e dis la Frangipane – al è furnî un servizi al teritori in tiernis di trasferiment de cognossince e di supuart ae azion di valorizazion e disvilup volude de amministrazion comunâl».

In particolâr, il projet si interesse dal studi dal teritori costruît intal so passât resint, «tante tant impuartant par Cjstielgnûf, aree caraterizade di un depauperament cronic de popolazion ative, costrete a emigrâ puartant cun se cognossincis, capacitâts e memoriis, e colpide insot, intè sô identitât materiâl, de devastazion dal taramot dal 1976».